

Profesionalnan hoben den board nobo di Fundacion Mito Croes pa Estudionan Social Cristian

Aruba ta laga un biento fresco bula riba e plataforma politico

DURANTE dos dia siman pasa partido AVP a tene den Cas di Partido charlanan educativo, e asina yama 'Green Talks' riba diferente topico organisa pa fundacion FESCA.

Diabierna a instala e directiva nobo p'e fundacion cu awor a wordo dedica n'e erudita dr.mr. Mito Croes, kende a fayece algun siman pasa.

Fundacion Mito Croes pa Estudionan Social Cristian Aruba ta sigui traha den e mesun espirito cu Mito Croes semper a traha pa su isla y su partido.

E Think Tank di partido ta profila su mes riba diferente nivel cu estudionan riba tereno social, educativo, economico, finanza y mucho mas. Tur esaki cu e meta pa garantisar un mihor calidad di bida den tur sentido pa tur ciudadano riba e isla.

E directiva nobo ta consisti di Presidente, Phillipe LaReine, Carlos Tapias, Xena Profeet, Frank Hoevertz Jr., Monica Cervantes, Indrah Duarte y Johnathan Sjiem Fat. Den e siguiente diano lo enfoca riba e capacidad y estudio di cada un di e miembronan y con nan por aporta na trece cambianan strategico pa Aruba pa medio di e fundacion cu nan a caba di drenta.

Presidente Phillipe LaReine ta un MBA ehecutivo, kende a studia n'e Universidad di caliber halto Nijenrode.

Durante su estudio el a participa den programanan universitario na Universidadnan di Oregon na Merca y Stellenbosch na Sur Africa.

Tambe el a traha como consultant pa companianan di renombre manera Philips, Atradius y Nike.



Aparte di su MBA LaReine tin tambe un masters degree den Strategic Management di Universidad di Tilburg y un bachelor di Fontys University of applied science.

Actualmente LaReine ta trahando na Departamento di Asunto Exterior y prome cu esey den e mundo bancario funcionando den posicionnan halto na entro otro BNP Paribas trahando cu multinacionales grandi.

Banda di su trabou na Departamento di Asunto Exterior, LaReine

ta Presidente di e Fundacion di Museo na Aruba y tin varios otro logronan riba su nomber cu ta completa un tremendo CV. Phillipe LaReine, kende ta bay duna guia n'e team di profesionalnan hoben ta sin duda un 'lider' tur afo.

Su metanan pa Fundacion Mito Croes (FESCA) ta diverso y ta hala atencion.

LaReine: "Locual cu primordialmente nos ta enfoca riba dje ta busca y haya conocimiento pa medio di estudionan.

Na Aruba tin reto of preguntanan riba cierto desaroyo y a base di esey nos kier crea un vision hunto cu partido AVP."

AWEMainta #1 Online

Tel: **583-1400**

Fax: **583-1444**

Facebook: www.facebook.com/awemainta

Website: www.awemainta.com

E-mail: noticia@awemainta.com